

26 OCT 2003

Zaharah-Banjir

JABATAN KEBAJIKAN MASYARAKAT SIAP SEDIA HADAPI BANJIR

ALOR GAJAH, 26 Okt (Bernama) -- Jabatan Kebajikan Masyarakat (JKM) sudah bersiap-sedia untuk menghadapi sebarang kemungkinan banjir yang lebih besar terutama menjelang musim tengkujuh hujung tahun ini.

Menteri Perpaduan Negara dan Pembangunan Masyarakat Datuk Seri Dr Siti Zaharah Sulaiman berkata semua jentera banjir JKM di peringkat pusat dan negeri telah diselaraskan dan diarahkan sentiasa bersedia untuk menyalurkan sebarang bantuan sekiranya berlaku banjir.

"Selalunya sekiranya berlaku bencana banjir seluruh negara, Jawatankuasa Bencana Alam yang dipengerusikan oleh Timbalan Perdana Menteri Datuk Seri Abdullah Ahmad Badawi sentiasa memberi perhatian untuk sebarang bantuan," katanya kepada pemberita selepas menyampaikan bantuan kepada warga emas dan anak yatim di Parlimen Alor Gajah dekat Masjid Tanah, hari ini.

Turut hadir pada majlis anjuran Pergerakan Wanita Umno Bahagian Alor Gajah itu ialah Ketua Umno Bahagian yang juga Pengerusi MARA Datuk Wira Abu Seman Yusop.

Beliau berkata semua JKM negeri telah menerima peruntukan masing-masing untuk menyalurkan bantuan sekiranya berlaku banjir, dan mereka boleh memohon kepada kementerian jika memerlukan peruntukan tambahan.

Siti Zaharah berkata semua kemudahan logistik juga telah disediakan termasuk menyediakan bekalan untuk keperluan orang ramai semasa banjir berlaku.

Dalam perkembangan lain, beliau berkata rakyat di negara ini perlu mengubah sikap dan sentiasa bersatu untuk memajukan diri masing-masing sebagai satu cara dalam memberikan penghargaan kepada Perdana Menteri Datuk Seri Dr Mahathir Mohamad yang akan bersara Jumaat ini.

"Sepanjang menjadi Perdana Menteri, 22 tahun, beliau (Dr Mahathir) telah berusaha untuk memajukan bangsa, membentuk disiplin rakyat serta mengubah sikap orang Melayu berusaha memajukan diri sendiri.

"Oleh itu, kita sebagai rakyat Malaysia perlu merealisasikan harapan dan perancangan yang telah diusahakan oleh Dr Mahathir selama ini. Dan inilah cara kita untuk membalas budi dan menghargai beliau sebagai Perdana Menteri yang disayangi," katanya ketika ditanya sumbangan yang boleh dilakukan oleh rakyat untuk menghargai Dr Mahathir.

Katanya Timbalan Perdana Menteri Datuk Seri Abdullah Ahmad Badawi yang bakal mengambil alih jawatan Perdana Menteri juga telah menyatakan ikrar untuk meneruskan tanggungjawab membangunkan negara dan memajukan bangsa.

Pada majlis itu seramai 65 warga emas dan 30 anak-anak yatim diberi bantuan berupa makanan, hamper dan wang tunai.

-- BERNAMA

SBS RHM